


籌濟編

六七



九	三	九	漢
七	三	〇	書
一	〇	三	門
冊	架	函	號

元	九	漢
函	二	書
二	二	
架	冊	號

內閣文庫	
番號	漢 9229
冊數	10( 3)
函號	295 44



籌濟編卷六

發賑

與救災條參看

五經無賑字。月令仲春振乏絕。左傳文十六年振廩同食。振俱作賑解。而不作賑字。惟爾雅釋言賑。富也。註謂殷賑富有。

與賑給之義稍別。周禮賑無明文。然考旅師平頒與積。司稼

調其急。又有鄉里委積恤難。阨縣都委積待凶荒。鄉師歲時

以王命施惠。想成周時。庶民既各有耕九餘三之積。在上又

屢有補不足助不給之恩。無在非賑。而不必言賑。是以荒政

淺草文庫

常熟楊景仁靜閑輯

籌濟編

卷六 發賑

散利。後儒以爲發倉廩。而鄭司農祇言貸種食。未嘗明言賑也。發倉賑民之文。始見于漢文帝紀。蓋後世民鮮蓄積。而又無旅師等官。以時調恤之。苟塗有餓莩。而不知發。則民不聊生。是發賑實爲救荒正務矣。

功令于地方。遇水旱等災。將貧民普賑一月。不論成災分數。不分極貧次貧。是曰撫卹。卽爲正賑。及查明分數。區別極次。具題加賑。是爲大賑。賑畢後。或係連年積歉。或當年又有重災。臨時又奏請再加賑恤。或奉

恩旨軫念窮民青黃不接。特再加賑。是爲展賑。總期剔弊端。施實

惠而已。爲發賑條第五

周齊景公之時。霖雨十有七日。公飲酒。日夜相繼。晏子請發粟于民。三請不見許。遂分家粟于氓。徒行見公。曰。懷寶鄉有數十。飢氓里有數家。百姓老弱凍寒。不得短褐。飢凍不得糟糠。而君不卹。里窮而無告。無樂有君矣。嬰隨百官之吏。使上淫泆失本。而不卹。嬰之罪大矣。再拜請身而去。公趣駕追及之。曰。寡人有罪。夫子不顧社稷百姓乎。寡人請奉齊國之粟米財貨。委之百姓。多寡輕重。惟夫子之令。晏子乃返命。稟巡氓家有布縷之本。而絕食者。使有終月之委絕本之家。使有期年之食。無委積之氓。與之薪燎。使足以

畢霖雨三日吏告畢上貧氓萬七千家用粟九十七萬鍾薪燎萬

三千乘懷寶三千七百家用金三千晏子春秋○景仁按懷寶鄉有數十言富家之多也命稟

巡氓具廩粟以巡行編氓猶勾踐載稻于舟以行之意也絕本之家并無布縷者也薪燎薪以供炊燎為築室材木因久雨水潦壞

屋給以修葺之資也近世孫氏星衍撰晏子春秋音義以薪燎概為禦雨之具似未分晰用金三千言富民出金之數勸分之義

漢文帝後六年夏大旱蝗令諸侯無入貢弛山澤減諸服御損節

吏員發倉庾以賑民漢書

武帝四年山東被水天子遣使者虛郡國倉廩以振貧民史記

汲黯為謁者河內失火上使黯往視之過河南貧人傷水旱萬餘

家或父子相食以便宜持節發河南倉粟以振貧民請歸節伏矯

制之罪上賢而釋之史記

元帝初元元年關東大水飢或人相食轉旁郡錢穀以相救漢書

光武帝建武六年詔曰往歲水旱穀價騰躍百姓無以自贍命郡

國有穀者給稟稟賜穀也○後漢書○景仁按稟音懷給也歐陽氏曰古者給人以食取之倉廩故稱稟

和帝永元五年遣使者分行貧民舉實流冗流散者舉案其實而給之開倉賑

廩三十餘郡後漢書

安帝永初七年調零陵桂陽丹陽豫章會稽租賑給南陽廣陵下

邳彭城山陽廬江九江飢民後漢書

安帝立鄧太后臨朝政每聞人饑或達旦不寐躬自減徹以救災

阨故天下復平歲還豐穰後漢書

順帝陽嘉元年以冀部比年水潦民食不贍詔案行稟貸勸農功

賑乏絕後漢書

第五訪遷張掖太守歲饑粟石數千訪乃開倉賑給以救其敝吏

欲上言訪曰若須奏報是棄民也太守樂以一身救百姓遂出穀

賦人順帝璽書嘉之由是一郡得全後漢書

劉陶游太學時有上書言人以貨輕錢薄故致貧困宜改鑄大錢

陶上議曰當今之憂不在于貨在乎民饑比年以來良苗盡于蝗

螟之口杼軸空于公私之求所急朝夕之餐豈謂錢貨之厚薄哉

民可百年無貨不可一朝有饑故食為至急也後漢書

皇甫嵩領冀州牧奏請一年租賑饑民歌之曰天下亂兮市為墟

母不保子兮妻失夫賴得皇甫兮復安居續漢書

三國魏黃初三年冀州饑使尙書杜畿持節開廩以振之五年

冀州饑遣使振之六年遣使者巡行許昌以東盡沛郡問民所

疾苦貧者振貸之魏志

吳孫權赤烏三年民饑詔開倉廩以賑貧窮吳志

晉武帝泰始五年青徐兗三州水遣使賑卹之晉書○景仁按惠

等州大水遣御史巡行賑卹成帝咸康元年揚州諸郡饑遣使賑給典午尙能行恤災之政特載一二以概其餘

鄭默為東郡太守值歲饑默輒開倉賑給乃舍都亭自表待罪朝廷嘉默憂國詔書褒歎比之汲黯頒告天下若郡國有此比者皆聽出給晉書

華譚為邾令境內饑饉譚傾心撫卹司徒王戎聞而善之出穀三百斛助之晉書

南北朝宋孝武帝大明七年浙江東諸郡大旱遣使開倉賑卹聽受雜物當租南史○景仁按八年詔去歲偏旱可出倉米隨宜贍濟若溫拯不時以至捐棄者嚴加糾劾恤災亦切矣齊王珍國為南譙太守郡境苦饑乃發粟散財以賑窮乏高帝手敕云鄉愛人活國甚副吾意宋書

梁天監十五年明山賓出為北兗州刺史所部平陸縣不稔啟出倉米以賑百姓後刺史檢州曹失簿以山賓為耗損有司追責籍其宅入官山賓不自理更市地造宅南史

北魏文成帝興安元年詔以興州蝗開倉賑卹和平五年詔以州鎮十四去歲蟲水開倉賑卹魏書○景仁按獻文孝文嗣統各年除州郡水旱給賑外二月以京師穀貴出倉粟八十萬石賑貧六月又出太倉粟五十萬石賑京師及州郡饑民斷食粟之畜下就穀之詔撤懸減膳可謂勤恤其民蓋文成之矜濟為心足垂憲奔禩矣

城陽王徽明帝時為并州刺史先是州界早霜安業者少徽輒開倉賑之文武共諫止徽曰我皇家親近受委大藩豈可拘法而不

救民困也。先給後奏。孝明嘉之。加安北將軍。北史

閻慶允為東秦州敷成太守。清勤勵俗。頻年饑饉。慶允常以家粟千石賑卹貧窮。民賴以濟。部民申頌美政。魏書

唐元宗開元十五年八月。制曰。河北州縣水災尤甚。朕當寧興思有勞旰晷。在予之責。用軫于懷。宜令所司量支東都租米二十萬石賑給。康濟錄

德宗貞元十二年。詔諸道遭水州府。以當處義倉斛斗據所捉多少量事賑給。給訖具數奏聞。文獻通考

德宗時諸州大水。陸贄請賑。帝曰。淮西缺賦。不宜賑。贄曰。寧人負

我無我負人。康濟錄

憲宗元和間。南方旱饑。遣使賑恤。戒之曰。朕宮中用帛一匹。皆籍其數。惟賑救百姓。則不計所費。卿輩宜識此意。通鑑

元和九年制曰。去歲旬服。氣序愆和。產于地者。既微出于力者。宜困百姓所欠。歷年稅斛等項。並宜赦免。仍以常平義倉斛斗三十

萬石。委京兆條疏賑濟。如不足。即宜以元和七年諸縣所貯折糴斛斗添給。差擇清幹官于每縣界逐處給付。使無所弊。各得自資。

康濟錄

文宗開成四年。滄景節度使劉約奏請義倉粟賑。遭水百姓。詔曰。

本置義倉。只防水旱。先給後奏。敕有明文。劉約所奏。已為遲晚。宜速賑恤。康濟錄

楊於陵遷浙東觀察使。越人饑。請出粟三十萬石。拯贍貧民。政聲流聞。唐書

員半千調武陟尉。歲旱。勸令殷子良發粟賑民。不從。及子良謁州。半千悉發之。下賴以濟。刺史大怒。囚半千于獄。會薛元超持節渡河。讓之曰。君有民不能卹。使惠出一尉。尚可罪耶。釋之。唐書

韓思復調梁府倉曹參軍。會大旱。輒開倉賑民。州劾責對曰。人窮則濫。不如因而活之。無趣為盜賊。州不能詘。唐書

宋諸州歲歉。必發常平惠民諸倉粟。或平價以糶。或貸以種食。或直以賑給之。無分于主客。戶不足。則遣使馳傳發省倉。或轉漕粟于他路。或募富民出錢粟。酬以官爵。勸諭官吏。若舉放以濟貧者。秋成官為理償。又不足。則出內藏。或奉宸庫金帛。鬻祠部度僧牒。東南則畱發運司歲漕米。或數十萬石。或百萬石。濟之。宋史。景仁按。宋治本于仁厚。凡遇災荒。拯救之法。無不畢具。詳見食貨志。

真宗五年。遣使詣雄霸瀛漠等州。為粥以賑饑民。兩浙提刑鍾離瑾言。百姓闕食。官設粥糜。民競赴之。有妨農事。請下轉運司量出米賑濟。家得一斗。從之。通考





仁宗曰賑濟之法州縣不能舉行夫以政殺人與刃無異今出入一死罪有司未嘗不力爭至于凶年饑歲老弱轉死溝壑而在位者殊不恤此由于政事不修而士大夫不知務也通考

仁宗時歲大蝗旱江淮京東滋甚范仲淹請遣使循行未報因請間曰宮掖中半日不食當何如帝惻然乃命仲淹安撫江淮所至開倉賑之宋史

姚仲孫判滁州歲旱饑有詔發官粟以賑民而吏不時給仲孫至立劾主吏夜索丁籍盡給之宋史

張傳知楚州會歲饑貽書發運使求貸糧不報嘆曰民轉死溝壑矣報可待耶乃發上供倉粟賑貸所活以萬計因拜章待罪上獎之宋史

熙寧八年吳越大旱趙抃知越州先民之未饑為書問屬縣被災者幾處鄉民當待廩者幾人庫錢倉粟可發者幾何富人可募出粟者幾家僧道所入羨粟書於籍乃錄孤老病不能自食者二萬一千九百餘人故事歲廩窮人當給粟三千石而止抃簡富民所輸及僧道羨餘得粟四萬八千餘石佐其費自十月朔人日受粟一升幼小者半之憂其眾相雜也使男女異日而人受二日之食憂其且流亡也於城市郊野為給粟之所五十有七使各以便受

之而告以去其家者勿給計官職之不足用也取吏之不在職而寓于境者給其食而任以事故事廩窮人盡三月止是歲五月而止事有非便者拊一以自任不累其屬有上請者遇便宜輒行是歲旱疫吳越民死者殆半拊所撫循皆無失所蓋民病而後圖之與先事而為計者則有間矣殆可為後世法臣鑒錄。景仁按名以救荒之術。發廩勸分。而以家資先之。南豐集有趙越州救災議于瑣屑凌雜處委曲料理。可見大經濟人心最精細。

熙寧中浙江數郡水旱災傷詔撥本路上供斛斗二十萬石賑濟宋史。景仁按真宗大中祥符間詔江淮發運司歲留上供米五干石以備饑年賑濟紹興中從戶部尚書韓仲通之請以上供所餘之數歲椿一百萬石別廩貯之以備水旱此儲于平日者而截漕救荒實始于熙寧之詔紹興五年湖南旱呂頤浩為帥奏截撥

上供米三萬石又令廣西漕帥兩司備五萬石水運至本路賑濟此又截他省漕米以救荒之始明儲囷云目前救荒簡便應急莫如截留漕運之米為善良然

益州路饑韓忠獻公琦為安撫使簡州艱食為甚明道中以災傷嘗勸納粟後糶錢十六餘萬歸常平公曰是錢乃賑濟之餘非官緡也盡發以給四等以下戶蜀人曰使者之來更生我也名臣言行錄

哲宗元祐六年翰林學士承旨知杭州蘇軾言浙西二年諸郡災傷今歲大水蘇湖常三州水通為一杭州死者五十餘萬蘇州三十萬未數他郡今既秋田不種正使來歲豐稔亦須七月方見新穀乞令轉運司約度諸郡合糶米斛數目下諸路封椿及年計上

供赴浙西諸郡糶賣詔賜米百萬斛錢二十餘萬緡賑濟災傷通考  
 徐寧孫賑饑策本州縣官盡實抄劄果係孤老殘疾并貧乏不能  
 自食者大人小兒籍定姓名數目將義倉米逐鄉逐鎮逐坊逐巷  
 分散賑濟請鄉官或士人各三人如無上戶士人處請耆老忠厚  
 者置冊收支給散關子每五日一次併而給之大人日給一升小  
 兒減半凡市鎮鄉村並令同日同時支散以革重疊冒請之弊乞  
 丐等亦同日同時別作一處支米不得混入饑民當支散日用五  
 色旗分爲五處每處差指使二員吏二名抄劄饑民每一名給與  
 牌子并小色旗候支散及數前來賑濟散了一旗再散一旗不許

亂赴請所蓋事貴循序不得併在一處挨擠喧鬧康濟錄

范堯夫知慶州餓殍滿路官無穀以賑恤公欲發常平封椿粟麥  
 濟之州縣皆欲俟奏請得旨而後散公曰人不食七日卽死諸君  
 俱勿憂有罪吾獨坐卽日發賑所活無算山堂肆考

宣和中洪皓爲秀州司錄大水民多失業皓白郡守以賑荒自任  
 發廩損直以糶民空集皓恐其紛競乃別以青白幟涅其手以識  
 之令嚴而惠徧浙東綱米過城下皓白守邀畱之守不可皓曰願  
 以一身易十萬人命人感之切骨號洪佛子宋史○景仁按當時  
 流熒塞路皓平糶于  
 城之四隅每升減市直錢五揭價于青白旗無敢貴糶不能自食  
 者爲主之立屋于東南兩廢寺十人一室男女異處防其淆僞涅

黑子識其手。東五之南三之負。爨樵汲有職。侵牟鬪鬻者亂其手。文逐之。荒政之肅。雖軍政不是過也。及所借發運錢。且盡復以御。筆所起之。四萬斛。綱米遣吏鎖津柵。截畱之。使仰哺之衆。不至中道。餓死。可謂膽大心細矣。適廉訪使王孝竭至郡。驗視。曰。請爲君脫違制之罪。呼吏草奏。皓曰。食猶未足。公能終惠。更得二萬石。乃可。孝竭以聞。米如數而得。前後所活者九萬五千餘人。洪忠宣之恤民。固不遺餘力。而王廉訪能成人之美。亦存心忠愛者。可謂兩賢。

高宗二十八年。浙東西田苗損于風水。詔以義倉賑濟。在法水旱

檢放及七分。以上者濟之。詔自今及五分處。卽撥義倉米賑濟。考

葉夢得爲許昌令。值水災。浮殍不可勝計。夢得發常平倉所儲。奏

乞越制賑民。全活數萬。臣鑑錄

丁諷知蔡州。設法賑饑。活者六十餘萬。及代蔡人號泣請畱閉門

斷橋不得行者累日。臣鑑錄

孝宗乾道七年。饒州旱傷。截畱在州椿管上。供米三萬石。獻助米

二千石。本州義倉八萬餘石。又撥附近縣義倉五萬石。又請借會

子五萬貫。接續收糴米麥賑濟。康濟錄

程師孟提點夔路無常平粟。建請置倉。適凶歲。賑民不足。卽矯發

他儲。不俟報。吏懼不可。師孟曰。必俟報。饑者盡死矣。竟發之。宋史

朱子嘗言于上曰。臣曾摹得蘇軾與林希書。謂熙寧中荒政之弊。

費多而無益。以救遲故也。其言深切。可爲後來之鑒。康濟錄

許份知鄧州。鄰路饑。流死係道。鄧州賴公獨安。詔公賑濟。公置場

列室異器用異旌物鳴鼓給食率三日一詣問饑飽而勞苦其病  
羸凡十月全活饑民二萬六千九百有奇名臣言行錄續集

真德秀為江東轉運副使江東旱蝗德秀與憲司大講荒政親至

廣德以便宜發廩使教授林庠賑給竣事而還百姓數千人送之

郊外指道傍叢冢泣曰此皆往歲饑死者微公輩已相隨入此矣

索毀太平州私創之大斛寧國守張忠恕私匿賑濟米劾之宋史

李道傳提舉江東路夏大旱條上荒政與漕臣真德秀賑饑道傳

分池宣徽三州窮冬行風雪中雖深山窮谷必至賴以全活者甚

衆宋史

薛弼改湖州運判進直秘閣時道殣相望弼以聞帝命給錢六萬

緡廣西常平米六萬斛鄂州米二十萬斛賑之民賴以甦宋史

龔茂良拜參知政事淮南旱茂良奏取封樁米十四萬委漕帥賑

濟或謂救荒常平事遽取封樁米毋乃不可茂良以為淮南民久

未復業饑寒所迫萬一嘯聚患害立見豈能計此米乎他日上獎

諭曰淮南荒旱民無饑色卿之力也宋史

范成大除端明殿學士尋帥金陵會歲旱奏移軍儲米二十萬賑

饑民減租米五萬宋史

馬亮知昇州行次九江屬歲旱民饑乃邀湖湘漕米數千艘以賑

之因奏瀕江諸郡皆大水而吏不之救願罷官糴令民轉粟以相  
贖足朝廷從之厚德錄

李允則知潭州會湖南饑欲發官廩先賑而後奏轉運使執不可  
允則曰須報踰月則饑者無及矣明年薦饑復欲先賑轉運使又  
執不可允則請以家資為質乃得發廩賤糶宋史

查道知虢州秋蝗災民歉道不候報出官廩米賑之又設粥以救  
饑者給州麥四千石散民為種民賴以濟所活萬餘人宋史

慕容德豐知慶州又改靈州穀價湧貴德豐出私廩賑饑民全活  
者眾宋史

錢觀復知廣德軍歲饑議發常平倉部使者不可觀復諭屬吏曰  
民命在朝夕敢不獨任擅發之責乎復請于朝盡蠲歲租常熟志

元世祖中統二年甘州饑給銀以賑之沙肅二州乏食給米鈔賑  
之至元五年益州路饑以米三十一萬八千石賑之六年大名路  
等饑賑米十萬石東平路饑賑米四萬一千三百餘石東昌路饑

賑米二萬七千五百九十石濟南饑以米十二萬八千九百石賑  
之高唐固安二州饑以米二萬石賑之十年諸路蟲蝻災五分霖

雨害稼九分賑米凡五十四萬五千五百九十石元史○景仁按  
世祖混一海宇  
在位三十五年壽八十享祚悠久而開國宏規尤重荒政詳考帝  
本紀賑荒之舉無歲無之此特載至元十年前事以例其餘可見

盛世不以無災為貴。而以能救災為尚也。

成宗元貞元年夏陝西旱飢行省右丞許辰議發廩賑之同列以

未經奏請不可辰曰民為邦本今飢餒若此倘俟命下無及矣擅

發之罪吾自當之遂發粟賑貸命亦尋下通鑑○景仁按辰一名忽魯火孫世祖賜今名

俾從許衡學其賑饑之明年關中復旱禱于終南山而雨歲以大熟民皆畫像祀之

仁宗延祐間蓋苗授濟寧路單州判官歲饑白郡府會他邑亦以

告郡府遣苗至戶部以請戶部難之苗伏中書堂下出糠餅以示

曰濟寧民率食此況不得此食者尤多豈可坐視不救乎因泣下

時宰大悟凡被災者咸獲賑焉元史

延祐之後腹裏江南饑民歲加賑恤其所賑或以糧或以鹽引或

以鈔元史

王克敬除江浙行省都事番陽大飢總管王都中出廩粟賑之行

省欲罪其擅發克敬曰番陽距此千里比待命民且死彼為仁而

吾屬顧為不仁乎都中因得免元史

關中大旱飢民相食特拜張養浩為陝西行臺中丞聞命即散其

家之所有與鄰里貧乏者道遇饑者即賑之死者則葬之到官六

月未嘗家居止宿公署夜則禱于天晝則出賑饑民終日無少怠

元史

徹里帖木兒議賑飢民其屬以為必縣上府府上省然後以聞帖木兒慨然曰民飢死者已眾乃欲拘以常格耶往復累月民存無幾矣此蓋有司畏罪將歸怨于朝廷吾不為也大發倉廩賑之乃請專擅之罪文宗聞而悅之元史

明洪武二十七年定災傷去處散糧則例大口六斗小口三斗五

歲以下不與續通考

成祖永樂九年戶部言賑北京臨城縣飢民三百餘戶給糧三千七百石有奇上曰國家儲蓄上以供國下以濟民故豐年則歛凶年則散但有土有民何憂不足隋開皇間旱饑文帝不開倉賑濟

聽民流移就食末歲計所積可供五十年倉廩雖豐民心勿固前

鑑具在今後但遇水旱民飢即開倉賑給無令失所康濟錄。景仁按唐太宗

謂王珪語亦以隋為鑑英主所見略同

永樂十四年北京河南山東饑發粟一百三十八萬賑之通鑑綱目三編

永樂十八年皇太子過鄒縣見民持筐拾草實駐馬問所用對曰

歲荒以為食太子惻然歎曰民隱不上聞若此乎時山東布政使

石執中來迎責之曰為民牧而視民窮如此亦動念否乎執中言

凡被災之處皆以奏乞停今歲秋糧太子曰民飢且死尚及徵稅

耶汝速勘飢民口數悉發官粟賑之太子至京即奏之帝曰范仲



淹之子猶能舉麥舟濟其父之故舊況百姓吾赤子乎明史 孽要

梁洞奉命賑徐州飢民時蕭瑒二縣民亦多飢者洞欲賑之有司

以未有命沮洞洞曰民皆王民何坐視其死耶有罪吾自任之遂

發粟賑濟多所全活事聞太宗嘉之獻徵 錄

英宗正統間周忱巡撫江南適江北大饑巡撫都御史王竑借三

萬石于忱忱計至來歲麥熟曰此須十萬卽以與焉蓋忱所積餘米

不但贍江南又可兼利江北康濟 錄

景帝景泰二年王竑巡撫江北時徐淮連歲飢荒竑大發官倉賑

救諸倉空虛獨廣運倉尙有滯積此備京師之用者也一中貴一

戶部官主之竑欲發而主者難之竑曰民惟邦本窮至此旦夕爲

盜且上憂朝廷何論備京師爾不吾從脫有變吾先殺爾治爾召

盜罪然後自請死竑詞旣戇主者素憚其威許之所活百五十八

萬八千餘人共用米一百六十餘萬石先是徐淮大饑帝于櫻橋

上閱疏驚曰餓死我百姓矣後得開倉賑濟之奏又大言曰好御

史不然百姓多餓死矣康濟 錄

英宗天順元年夏四月直隸山東饑遣僉都御史林聰等賑之聰

屢請發帑徐有貞曰發帑賑濟徒爲有司乾沒耳李賢曰有弊勝

于無賑帝從賢議時方遣使通西域衛吏張昭上疏曰畿輔山東

仍歲災歉。小民鬻賣子女。無有售者。轉死溝壑。即成市鬻。望陛下用和番之費。遣使急賑。庶猶可救。報聞。通鑑綱目三編

神宗萬歷二十餘年。御史鍾化民河南賑荒垂危之人。賑粥有願。惜體面者。散銀賑之。著州縣正印官下鄉親放。移官就民。毋勞民。就官分東西南北四鄉。先示散期。以免奔走伺候。貧民領得錢穀。或里長豪惡。要抵宿負者。以劫論。出首者賞其銀。正印官監視。戡鑿逐封。加印立冊。期日分給。差廉能官。不時擊封。秤驗躬巡。所至延見各色人等。不嫌村陋。康濟錄  
戴浩改鞏昌守。值歲大祲。矯發邊儲三萬餘。賑飢。奏曰。臣請以一

人之命而活千萬人之命。優詔原之。獻徵錄

國朝陸氏曾禹曰。百姓之身家國之倉廩所由出。年歲豐登。民則為上。實倉儲。早潦告災。君即為民謀。保聚蓋君猶心而民猶體。體安心始泰。未有百姓困阨於下。而君臣能相安於上者也。誠能發積儲以救羣黎。則一方安樂。薄海內外皆安樂矣。康濟錄  
方恪敏公觀承曰。田禾災而賑。郵行賑所以救農也。農民力出於已。賦效於公。凡夫國家府庫倉廩之積。皆農力所入。出其所入於豐年者。以賑其凶災。

德意無窮。而恩施有自。有非可以倖邀者矣。司賑者先視田畝。被災輕

重復審其居處器用牛具之有無存棄以別極貧次貧其不因災而貧者則非農也傭工之農耨耨而飢餓隨之極貧者爲多此與傭食於主家者有別也孟子曰樂歲終身苦凶年不免於死亡此農民之待賑爲切而急賑加賑之澤爲甚厚也不因災而貧者亦賑誤以賑爲博施之舉也不必皆貧而衰老者亦賑誤以賑爲養老之典也乞丐得飽於凶年將無啟其樂禍之心乎傭人安坐而得食將無墮其四體之勤乎夫農飢則四民皆飢穀貴則百物皆貴蓋推廣

恩澤而及之耳非賑政之本意也觀於給貧生則用存公餘款給旗莊則用井田官穀益知災賑之大發正帑首重救農其餘乏食之民不過爲區別斯可矣未可與農民並論也賑災必先審戶固不能不需時日但其中已不無飢餓待斃者所爭惟在旦暮又不可概俟賑期不亟賑救

聖澤

汪濊發金發粟本以保全民命若惟常例是拘卽是奉行不善嗣後於勘驗戶口時遇有老病孤苦情狀危慘非急賑之不生者驗明情形卽知會印官先行摘賑照口米例或錢或米卽日給付此較極貧之應續賑者又有緩急之別然亦不過百中之一二所用錢米另記簿冊請銷其飢口姓名住址並某員所查詳載備核於

冊所注極貧下添又被災最重村莊生計尤艱次貧之戶轉瞬便  
註續字入於續賑成極貧其極次之間須倍加審酌填寫宜概從優厚又極貧戶內  
 有久不得食藉糠粃為活者須注明續賑字樣毋得遺忘又合一  
 州縣戶口查畢開賑雖舊例為然亦須酌量災地輕重如貧民實  
 有迫不及待之勢則先儘一鄉查畢即定期開賑四鄉以次施行  
 亦屬變通之道印委官詳酌定議稟報一面辦理至成災五分  
 例惟蠲緩無賑但五分與六分相近恐勘報稍有不確或氣涼霜  
 早分數減變均未可定應照乾隆三年直隸舊案將五分災內無  
 地極貧酌量抽賑照六分成災定例查辦造報有地次貧不給

大賑於十一月初一日開賑按月散給

併月散給官省民費

極貧戶內有老

病孤寡全無依倚一經停賑即難存活者應請於八月普賑後仍  
 續賑九十兩月俾接至大賑加賑之月丁口有病故者例應按  
 數裁減然念死者歛埋需費況在凶年雖積一口累月之糧猶不  
 足償奈何減之亦有隱匿不報者鄉地從而擠分之是徒奪其半  
 口之食而於公無益也用是明著為令凡賑戶死口概不核減  
 散賑定例州縣本城設廠四鄉各於適中處所設廠俾一日可以  
 往返倘一鄉一廠相距仍遠天寒日短領賑男婦栖託無地地方  
 官勿拘成例勿惜小費更多設一二廠務使婦女老弱辰出晚歸

母致寒天塌蹶露宿單行。監賑官須前夕就廠住宿。及早開放。不得任情自便。致累守候。村民當領賑時。急於得飽。非立法大為之防。則諸患生焉。道里不均。有往返之勞。場宇不寬。有擁擠之慮。時日不定。有守候之苦。稱較有低昂。量概有盈縮。薦蓋少而米虞。蒸濕校貫。差而錢或短少。外出戶口之遺漏。重冒者。保鄰親族之扶同捏飾者。皆為患所宜防。議行規條十則。期於弊除而利可溥。余巡歷災區。先期籌畫。身之所不至。而心至之心。之所不至。而法已至之。庶幾弊無萌生。澤可下究耳。

一散賑大口日給米五合。穀則倍之。小口減半。銀米兼支。升米折銀一分五釐。一月三十日。

大口月給賑米七升五合。銀一錢一分二釐五毫。小口月給賑米三升七合五勺。銀五分六釐二毫五絲。普賑大賑俱按月放給。普賑一月不扣。小建加賑。小建之月大口全扣。一日銀七釐五毫。小口全扣。一日銀三釐七毫五絲。米不再扣。一賑廠每處委佐雜教職一員。駐廠監賑。專司稽察約束之事。詳明委任。以專責成。

攬糶和水私竊糶賣抽換銀封。役

弊竇種種。須明練者專司其事。

一印官領到庫銀。先期剪鑿。按賑冊村莊戶口總計。一戶大小口應賑半米銀數。庫平兌足。包封或製小袋。開寫姓名銀數於上。一村莊為一總包。照冊內戶口次第就廠散給。

小袋線穿。挨次俵散。最便。

一放賑前數日。將各廠附近村莊按

發賑

二

道里遠近人口多少均勻配定分為幾日支放多張告示注明某村某莊於某日赴某處廠所領賑仍諭各鄉地徧傳依期而赴不得遺漏。各村至廠道里應於散賑冊內添注。一廠門左右十丈外舉以長繩令鄉

地帶領賑戶人眾各按村莊排立以道路遠近為給發次第一村

莊之內先女後男先老弱後少壯。一法按村各書一旗立於村外曠地令飢民各聚旗下逐村隨

旗赴廠以天早則任先行日晏則責成鄉地攏合一村莊之人同

行毋許先後渙散。荒年暮夜負銀米孤行田野防生他虞。銀米所在闌以大木守以

役壯書役二名量米斗級四名在內供役銀米分置兩處貧民呈

票領米給竹籌一枝繳籌領銀不復驗票普賑大賑按所賑月分

製小戳記於票上印之停賑之月掣票一廠內貯米戒濕潤書

役按票開發不許畱前待後斗級按大小口數用新製木筒平量

不得短少拋撒違者聽監賑官究處。散米木筒槩板委員入廠時均須較驗無弊。一

賑廠許錢市之人就廠兌換官為定價一準庫平凡剪銀封銀即

用錢市之人貧民領銀就廠易錢但認封面所開銀數即照定價

給錢不須啟封稱較鋪戶按封合計是日所換總數仍繳原封於

官另給銀如數其繳回之碎銀又以供續次之用不煩重剪兼可

就原封改寫村莊姓名並省稱較也。一貧戶止一兩口者應照

市價折發錢文庫貯錢多或市錢易購則悉用錢折發更便。一

賑冊內有續字之極貧戶口自起賑日至十月底止核算共幾十  
 幾日應得銀米若干於普賑時一併支給其聞賑歸來之戶實係  
 某村莊外字號冊有名察其尤困苦者亦於回日起賑至加賑前  
 止按日支給銀米且須速給以其多一番流離之苦故宜並從優厚其外字號冊所  
 不載與勘不成災村莊託名外出及原有資產今回籍安業者概  
 不准給一外出之戶在各村已查之後陸續遞回及自歸者既  
 難隨時赴村察訊而傳喚地鄰亦滋煩擾應於本戶到縣之日詢  
 明所住村莊核對草冊外字號內姓名口數相符並其牌約地鄰  
 姓名填給執照一紙諭令於賑廠呈投卽就廠眼同地鄰查證確

實換給賑票添入紅冊一例領賑一離廠稍遠之村莊有孤寡  
 老弱病廢不能赴領者准本村親信之人帶票代領冊內註明代  
 領姓名以防竊票冒支之弊令本村地牌隨廠識認並詢問前後連名之人自無假冒一災  
 民衆多情偽百出有於領賑之後復攜家口外出者多係賣票復  
 往他處詭名重領亦有攜家口寄頓別屬而於放賑時單身回籍  
 領糧復出者應令地方牌鄰據實舉報於賑冊內刪除倘地鄰扶  
 同隱匿察出究處有首告者賞給口米一分賑紀  
 汪稼門先生志伊散賑條規一州縣凡遇成災便當早籌賑需  
 先將從前歷年被災輕重及用過銀米各數逐一查明再以現年

被災情形較比何年相等。雖歷年既久，戶口日增。今昔難以拘泥。第約略度計，現存倉庫共有若干，尙需若干，當卽稟請籌撥，併將該縣地方水路可通何處，道里若干，稟明以便酌核派運。至放給災民賑糧，應用乾潔米穀，不得將存倉氣頭厥底及濫收別縣潮濕米穀混行散給，致苦災民。其受撥州縣一經奉文，卽上緊選雇堅固船隻，照例給足水脚，遴差妥當丁役分押各船，星速饋運。如有船戶押役沿途偷賣攪水和沙霉爛缺少等弊，立即拿究追賠。受撥州縣或應於水次接收轉運入廠者，亦卽預覓舟車押赴交卸處所候運糧。一到照依制斛卽爲驗明斛收，出給印照。如有缺

少卽按數移追。如接收之後復有攪和缺少之弊，惟接受之員役是問。運糧員役例無盤費，不准報銷。一放賑宜多分廠所，各按被災附近村莊約在數十里者設爲二廠，須於適中寬地或寺院或搭篷每廠須設兩門，以便一出一入，領賑飢民務令魚貫而行，毋致擁擠喧嘩。每屆放賑必須先期將某某村莊在某處廠內何月日放給明白曉諭，並令地保莊頭傳知各戶，以便災民按期赴領，免致往返守候。一放給賑糧雖有銀米兼放之例，然須視地方情形酌辦。如係一隅偏災，四圍皆熟米充價賤者，則給賑銀留米以備急需。如係大勢皆荒，米少價貴之處，則多給賑米，少給賑



銀。庶。幾。調。劑。協。宜。至。於。銀。米。兼。放。廠。分。須。將。糧。米。預。為。運。貯。以。便。應。期。散。放。但。一。廠。之。中。務。須。分。斷。月。分。若。此。月。應。放。本。色。則。全。放。米。糧。若。放。折。色。則。全。放。銀。封。切。不。可。二。廠。之。中。同。時。銀。米。兼。放。致。滋。飢。民。爭。執。一。定。例。賑。糧。每。月。大。建。大。口。給。米。一。斗。五。升。小。口。七。升。五。合。小。建。每。大。口。給。米。一。斗。四。升。五。合。小。口。七。升。二。合。五。勺。應。照。此。四。項。定。數。每。項。製。備。總。升。斗。各。數。十。副。該。州。縣。按。照。漕。斛。較。準。驗。烙。分。發。各。廠。應。用。以。免。零。量。稽。遲。且。使。斗。級。人。等。無。從。剋。短。倘。有。較。驗。不。準。以。及。故。為。剋。短。者。察。出。參。究。一。定。例。每。米。一。石。即。算。一。石。小。麥。豆。子。粟。米。亦。然。如。稻。穀。與。大。麥。每。二。石。作。米。一。

石。膏。梁。秫。秫。玉。米。每。一。石。五。斗。作。米。一。石。放。賑。如。有。前。項。雜。糧。俱。應。照。此。計。算。併。曉。示。災。民。知。之。免。受。吏。胥。欺。騙。一。放。折。賑。定。例。每。石。折。銀。一。兩。庫。平。紋。銀。按。月。給。發。如。奉。

**特恩加增米價應照所加之數增給該州縣務須預將各廠應放村莊**

戶。口。逐。一。查。明。每。村。莊。共。該。大。幾。口。小。幾。口。者。各。若。干。戶。照。一。月。折。賑。之。數。逐。一。剪。封。停。當。俟。屆。放。期。開。單。同。原。查。賑。冊。銀。封。點。交。監。廠。委。員。帶。往。按。戶。唱。放。戳。銷。原。冊。如。有。不。到。之。戶。即。將。原。銀。收。存。俟。其。續。到。驗。明。補。給。如。係。已。故。遷。除。之。戶。於。冊。內。註。明。截。支。月。分。原。銀。歸。款。如。有。捏。混。冒。銷。查。參。究。追。各。廠。委。員。仍。於。每。廠。每。屆。

放完之後。即將經放月分。飢口銀米各數具摺通報查考。至剪封折耗火工飯食。例不准銷帑項。如有以銀易米散放。當按時價計算。足錢通報核給。需用串繩運費。亦無准銷定例。均應印官設法捐辦。毋得借端剋短。及冒混請銷干咎。一災賑州縣務於正賑未滿一兩月前。先將地方賑後情形。察看明確。如果重災疊被之區。民情困苦。正賑尚不能接濟。麥熟者。應剖晰具稟。聽候酌辦。如奉

恩旨加賑。即照所指何項飢口。應賑月分。遍行曉示。災民仍照原給賑

票。按期赴廠領賑。放給之後。即於冊票內鈐用加賑第幾月放訖。

紅戳餘俱照正賑例一體查辦。一賑濟動用銀米。皆有一定年款。如司庫撥發甲年賑銀。止可作甲年賑用。不可挪作乙年別用也。即有急需動墊。亦當隨時備具批領詳司。劃作收放。或遇司發賑銀未到。暫用屬庫錢糧墊放。亦當隨時詳抵清楚。庶免混淆。今各屬多不論年款。混行挪墊。又不赴司作明收放。以致遞年賑剩。紊如亂絲。甚難清理。嗣後賑銀務照本款支用。如有挪墊急項。以及徑動屬庫錢糧者。務必隨時備具批領詳司。作明收放。先行清款。其用銀之應銷與否。仍聽本案核明歸結。至於賑用米款。如常平倉穀。奉撥留漕等項。方為正款。若有存倉兵行局郵搭運漕五

等米各有本款支解不得混行挪動致難歸款報銷嗣後州縣賑  
畢即將原撥銀米動存各細數造具動款冊送司查核以便稽核  
賑剩分別飭解清款不得一聽書吏高擱不辦任催罔應致煩差  
提一撫卹正賑加賑災民災軍既畢之後即應查造報銷簡細  
二冊如簡明冊應將被災分數列於冊首將撫卹正賑加賑按照  
月分大小分晰災分極次大小口數逐賑開造如有物故遷移截  
支各戶亦即逐月扣除然後結明大總列明動用銀米各數是為  
簡冊也應造四套造定之日先行具結分送司府道加結核轉其  
花戶細冊應將前項簡明總數開列於前次將被災區圖村莊逐

區逐圖逐村逐莊挨次造報如甲區被幾分災極次貧若干戶大  
小口若干內某戶大口若干小口若干務須總數相符南鄉歸南  
北鄉歸北不得顛倒錯亂其無田貧民併衛軍兵屬即於各該區  
圖村莊冊後附造毋漏是為花戶細冊也應造六套隨後送司彙  
轉至於貧生飢口冊應另照式造送簡細二項冊結併取學結同  
送荒政輯要  
那繹堂先生彥成奏甘省被旱請撥賑銀其略曰甘省被旱成災  
夏秋收成均難有望據藩臬兩司詳稱現已分委委員並移行道  
府馳赴確勘一經勘明自應即為賑恤此時靖遠等處已有飢民

強借搶糧之案。雖已懲辦完竣。惟窮民無食。繩以嚴法。其情實覺可憫。若從寬原宥。久而恐釀大事。賑卹事宜。不可不急為籌辦。現在甘省司庫支絀。若俟勘明成災。始請撥帑。尤恐緩不濟急。災黎失所。此時通盤計算。必得預籌賑銀。以備接濟。始免臨時歧誤。懇恩俯准。在甘肅鄰近省分撥銀一百萬兩。並令迅速解甘。務於七八月

間到齊。俾資給散。謹酌議章程具奏。一散賑宜添設木牌。遍掛各堡。以杜弊混也。查例載地方遇有賑卹。該管官將所報成災分數。應賑戶口月分。先期宣示。賑畢再將已賑戶口銀糧各數。覆行通諭。本極周詳。但向來散賑州縣。惟張掛告示。將應賑戶口銀糧

各數籠統開列。僅憑冊落細數。愚民無從深悉。底裏侵漁影射之弊。由此即生。此次應令散賑各州縣。除照舊出示曉諭外。另行置備木牌。開明某村戶口若干。應賑銀糧若干。逐細排列。村堡地名。人名填註數目。懸掛各村莊適中處。所俾民間家喻戶曉。照牌給領。倘書役鄉保人等。仍敢侵漁影射。以及藏匿木牌不掛者。民人可指名稟控。俾經手之人無從弊混。仍責令道府親查牌內所開與原報數目。是否相符。據實稟報。統俟查過後。方許撤收。仍委員前往。將該員等所掛木牌。照抄存於總督藩司衙門。以便與報冊核對。庶幾彰明較著。弊混可除。一散賑宜擇地方分廠。並著大

員往來督查以期安妥也。各地方官多設賑廠。按村堡戶口之多寡酌中定地。勿使窮黎苦其遠涉。間有須渡黃河者。亦應相度形勢。妥為籌辦。俾免風波之慮。至期即派原查戶口之員。分赴各廠。按牌照票逐名給散。先及婦女老幼殘疾。次及壯盛丁男。毋得擁擠吵嚷。或有本人不能赴領。託戶族親鄰代領者。令該處鄉保識認。即於冊內及木牌上登註姓名。俾有查考。其胥役鄉保人等。俱不得包攬代領。散完後即於冊內結明總數。鈐用圖記。殊標年月。日旁寫監散官銜名。預備上司調查。仍著道府大員於開賑之日。往來督查。毋使稍有差誤。一散賑銀糧宜查點足數。以免剋扣。

也查貧民應領銀糧。絲粒均關生計。應令道府大員隨處抽查。務使斛面戩頭俱無短少。或有以銀易錢給散之處。亦俱按照時價足數給散。毋得高擡錢價。扣短串頭。賑紀

景仁 謹按賑荒之法前代具備

本朝

聖

聖相承。平時敬天勤政。為小民計。康阜者無不至。偶值旱潦等災。一經飛章奏報。上廛宸衷。迅加賑卹。章程遞加周密。

訓誠備極精詳。尤非漢唐以下小補之術所能及也。查順治八年覆准。山左江浙水災。以倉穀賑窮民。以學租賑貧士。十年。

欽差部院堂官會同江南督撫。截留漕米。並鳳徐各倉米。賑淮揚災民。十一年。發戶禮兵工部庫貯銀十有六萬。並

內帑銀八萬。分賑直隸各府飢民。十三年。題准。八旗被災地畝。每六畝給米一斛。二十八年。撥戶部銀三十萬兩。賑濟直隸。康熙六年。覆准。旗地水災。每六畝給米二斛。九年。

命部院堂官往勘淮揚水災。以鳳揚倉米麥及捐輸等各項米穀賑給。如仍不敷。卽動正糧接濟。六十年。發帑銀五十萬兩。

命大臣往山陝買米賑濟。雍正六年。

遣侍郎副都統科道翰林往直隸順德等四府被水之處。分爲四路。每路各於戶部領帑銀二萬兩。查勘賑濟。若用倉穀。卽將本地倉穀動用具奏。又覆准。監賑各官。遵例減從無擾。經承造冊紙筆飯食之費。令各州縣量給。七年。議准。賑濟後。卽將銀米數目。戶口姓名。月日。刊刻告示。通行曉諭。以杜吏胥中飽。乾隆元年。議准。被災貧士。向不在齊民賑卹之列。原以鄭重斯文。但貢監生員。實有赤貧無食者。令報明該教官。造冊轉送地方官。按其家口。量加撫卹。二年。覆准。州縣散賑。假手書

言漢紀 卷二  
役米糧多雜沙土斗斛不能足數由有司漫不經心該管上司察出嚴參三年議准辦賑各官出力者分別保題議敘其有不實力奉行及舞弊者分別題參科罪四年覆准賑災時地方官預將被災分數賑卹事宜先行宣示俾愚民洞悉規條又覆准直隸被災地方於定議賑卹之外將災重之地各戶加賑一月災輕之地老弱貧民加賑一月又覆准地方偏災蠲賑倘有不肖書役暗中剋扣詭名冒領州縣漫無覺察者降二級調用五年議准各省賑濟米數參差嗣後大口日給米五合小口二合五勺多少適中著爲定例又議准凡遇

災歉游手貧民與力田之民一體與賑七年覆准淮南二衛被災飢軍坐落州縣一例分別賑卹又覆准安徽所屬之鳳陽等十九州縣被災飢民於八月撫卹夏秋連災者接撫兩月被災最重之地極貧之民撫卹畢卽於九月起賑四月次貧於十月起賑三月次重之地極貧於十月起賑三月次貧於十一月起賑二月次貧於十二月起賑一月鳳陽等五衛隨所坐州縣一例撫卹賑濟七年覆准江蘇銅山等九州縣續罹水災沛縣近城一帶原報次貧者轉成極貧應先加賑十月一月又議准地方如遇水旱卽

行撫卹先賑一月再行察明戶口六分者極貧加賑一月連撫卹共兩月七八分者極貧加賑兩月連撫卹共三月次貧加賑一月連撫卹共兩月九分者極貧加賑三月連撫卹共四月次貧加賑兩月連撫卹共三月十分者極貧加賑四月連撫卹共五月次貧加賑三月連撫卹共四月又議准若地方連年積歉抑或災出非常將應行賑卹事宜該督撫因時因地妥議題明除偶被偏災照例賑濟外其有不能照常辦理者或將極貧加賑自五六月至七月不等次貧加賑自三四月至五六月不等十一年議准河南鄆陵等州縣被淹成

災其永州等八州縣倉穀不敷銀米兼賑於舊例每石給銀五錢之外加增一錢散給又覆准兩江被災較重州縣加展賑卹月分每米一石加增二錢二十六年議准折賑米價奉旨加增折給者以加增之日為始二十七年直隸辦賑再撥部庫銀八十萬兩以濟賑需又截留河南山東新運漕糧十五萬石分撥水次附近被災州縣銀米兼賑三十一年發庫帑銀三百萬兩存留甘肅以備賑糶三十五年直隸水災撥部庫銀五十萬兩再發三十萬兩賑飢民又截留漕糧並撥通倉米四十萬石再撥二十萬石俾得寬裕賑給四十一年議准江



西水衝田禾每畝給籽粒銀一錢沙淤石壓每畝給修復銀二錢廣東每畝給賑銀五分廣西沙壓田禾須挑挖補種者每畝給賑銀二錢穀五斗水浸田禾可修復者每畝借給穀五斗田畝被衝不能修復者計口賑銀大口三錢小口二錢按畝賑穀每畝五斗湖南水衝田禾每畝給修復銀二錢雲南水衝田地每畝給挑培銀三錢沙壓田地每畝給銀二錢五十五年發部庫銀一百萬兩解往山東以備賑卹又撥兩淮運關各庫銀一百萬兩解交江督備賑又甘肅臯蘭等縣猝被嚴霜成災給予賑濟五十七年直隸順德府屬被旱於

通倉內再撥漕米二十萬石部庫內撥帑銀八十萬兩交督收貯備賑嘉慶三年撥蘇州藩庫糧道庫龍江揚州各關庫銀五十萬兩賑濟蘇省各屬飢民六年議准浙江被水田畝沙淤石壓者每畝給修復銀二錢水衝田禾每畝給籽種銀一錢五年浙省被水金華等縣成災十分者極貧給賑四月次貧與九分災極貧者給賑三月九分災次貧與八分七分災極貧者給賑兩月七分災次貧與六分災極貧者給賑一月每大口給米一斗五升小口減半六年京畿陰雨連旬永定河水泛溢將難民先行撫卹旋經分設飯廠煮賑直隸被

水地方撥司庫銀十萬兩速爲撫卹。又截漕米六十萬石發直督分運各州縣賑濟。又西路長新店等處待賑者多。於京倉內再撥米二千四百石設廠賑濟。是年撥兩淮解京銀一百萬兩。截留直省備賑。又飭查近京地方五城所屬戶口。其錢糧歸大宛兩縣者一併造冊給賑。勿致遺漏。十二年江南蘇州等十二府州廳屬晚稻蟲傷霧損。分別賑卹。綜觀前事。列聖勤卹民隱。不惜千萬億帑金以活窮黎。史不勝書。何能殫述。略舉梗概如此。而章程之遞加周密。實由

訓誡之備極精詳也。恭查康熙四十六年。

諭江南自夏徂秋雨澤愆期。業經飭令停徵。並發倉賑濟。顧倉穀數少。未足徧給。惟各州縣截留漕米。可以實惠及民。著總漕會同督撫往各州縣被災地方。親加察勘。將本年所徵漕糧。每州縣或留八九萬石。或留十萬石。酌量足支賑給之數。分別多寡。存留支散。今漕米尙未開兌。截現收之糧以濟待哺之衆。實於民生大有裨益。欽此。此截漕賑濟之始也。普賑大賑亦旣

恩施稠疊。冬杪春初。存養有資。而

聖主視民如傷。軫念三四月間正青黃不接之時。又爲籌畫接濟。酌加展賑。月分雍正三年。

諭直隸地方被水已截漕發倉多方賑卹但恐停賑之後正值東作之時農民謀食無策著再加賑一月如從前所發之米不足賑糶著確察奏請增發米糧欽此此被災次年春夏展賑之始允爲格外之

恩自時厥後

恩綸迭降展賑月分隨時酌定十一年江蘇常熟等二十三州縣及華亭等六州縣大賑三次後再加賑四十日並

諭有從前遺漏貧民查明增入補賑之內再被災竈戶照貧民例加賑一月欽此乾隆四年因江南上年收成歉薄正賑畢後將下江

極貧民加賑一月上江歉收較下江爲甚將被災五分以上之州縣加賑極貧者二月四分以下之州縣加賑極貧者一月十二年山東被水萊州府屬之平度等州縣成災六七分不等將屆停賑特

諭無論極次貧民再加賑一月於二月內給發又安邱諸城二縣原報被災五分之各村莊例不加賑春雨短少未報災之村莊雖稍有收成經半載有餘未免拮据無論已未成災加賑一月又山東被災州縣已多方賑卹復將被災最重之東平等二十三州縣於來春無論極次貧民概加賑兩月次重之齊

河等六十州縣衛所極貧加賑兩月次貧加賑一月並將河南漕糧內粟米全數截留撥運天津北倉漕米共足二十萬石以資接濟十九年因兩江上年被水今年遇閏麥秋較晚爲日更長

諭督撫等將被災州縣再行詳察應如何再加分別賑糶之處一面奏聞一面酌辦欽此三十三年江西南昌等州縣被災賑期已竣將南昌等九縣被災較重八九十分之極貧與九十分之次貧加賑兩月湖口等縣被災較輕七八十分之極貧九十分之次貧加賑一月三十五年江蘇各州縣上年水災將被

災九十分之極貧加賑兩月九十分之次貧八分之極貧加賑一月四十六年因安徽等處上年被淹正賑後將成災七八九分之極次貧軍民概行加賑一月又河南下游被黃水淹浸賑畢後將山東曹縣江南徐州等府災民俱展賑三月五十六年將上年蕭縣等縣八九分災無論極次貧民概展賑一月並衛所貧生兵屬照正賑例一體辦理嘉慶二年江南豐沛等縣被淹賑畢後再分別展賑一兩月三年山東曹單等州縣上年被水地畝無論災分極次一體接賑三月並截漕米四十萬石運往賑濟又曹單等州縣再賞賑三月此

皆因去歲之災傷。籌當前之接濟。資其力作。特展賑期者也。更有游饑為患。破格施恩者。乾隆七年。

諭江南上下兩江有疊被水災之州縣。已加意撫卹。思百姓於積困之餘。又罹水患。非加恩於常格之外。不足以拯阡危。最重者著於定例。月分之外。加展三月。其次加展兩月。至於災止六分。次貧不賑者。亦賞賑一月。其被災屯衛軍丁。照坐落州縣一例。加賑月分。又無業貧民。乏食生監。各隨所居鄉村。准其照例領賑。欽此。此憫

民積困。特加展賑之始。嗣後每遇奇災。

湛恩彌渥。八年。淮徐等府水災。低區積水較深。有非人力所能計日

宣洩者。

欽差大臣及督撫。將不能涸出補種之地。一一察勘。共有飢民口數若干。酌定月分。接續賑卹。十二年。山東被災州縣。已加展賑卹月分。復將被災六分之次貧。亦給賑一月。嘉慶六年。因直隸水災較重。明歲青黃不接時。大興宛平等六十州縣。及薊州等七州縣。於正月至四月。按村設廠。無論極次貧民。一體給賑。七年。將五城及蘆溝橋等處飯廠。俱展至四月二十日止。又以貧民度節。口食尙艱。展至五月初五日為止。十三年。因上年直隸通州等州縣被淹。業經賑卹。將雄縣等五州縣

成災九分之貧民展賑一月。銀米兼放。此皆  
施恩於恩浹之後。有加無已者也。若夫銀米兼放。定例米一石折給  
銀五錢。成災之地。米價必昂。每有不敷。究虞艱食。  
聖心早慮及之。乾隆二十年。諭江蘇被水成災。已截漕發粟俾賑糶所需。務從寬裕。其應賑戶口。  
令銀米兼賑。糧價稍昂。著加恩每米一石。加給銀三錢。以敷買食。  
至本年應運漕糧。除已截留外。現屆開徵。該省既經被水。米色顆  
粒自當稍減。所有交倉之米。並不論紅白粳。地方官酌量可收。  
一體概予收兌。此等米抵通卽先行撥放俸餉。又

諭浙江杭湖紹等府屬雨水過多。銀穀兼賑。現在糧價稍昂。若照例  
酌給。恐小民不敷買食。著加恩每穀一石。折銀七錢。每米一石。折  
銀一兩四錢。欽此。此折賑加價之始。二十四年晉省偏災。撫賑口  
糧每石折銀一兩六錢。又甘省折賑。河東每石加銀三錢。河  
西加銀四錢。因臯蘭等屬糧價尙未平減。於前加三錢四錢  
外。每石再各加給三錢。八年山東被災。每穀一石。於舊例外  
再增一錢折給。所以曲體艱食窮民者如此。且夫賑濟之事。  
稍緩須臾。災黎已擠於溝壑。是故宜速不宜遲也。乾隆十三  
年。

諭山東上年被災現今雨澤未降思就近接濟惟鄰封是賴與東省連界之直隸河南江蘇安徽等省卽將存倉積貯穀麥作速動撥委官運赴東省以備賑濟之用運到之日東撫一面奏聞一面散給其民間餘粟無論米豆雜糧廣爲招集以便購買協濟古稱救荒如救焚拯溺早一日得一日之濟該督撫等其曲體朕懷以拯患卹災爲急不可稍存此疆彼界之分以副朕痼瘝一體至意欽此仰見

至誠惻怛溥愛無私應機立斷不疾而速誠萬世辦災之要旨也是以二十六年河南祥符等縣河水漫溢

命大學士劉文正統勲會同巡撫飭地方官遇應行加賑之地隨查隨賑良以災口嗷嗷不能久待當厄之施以早爲貴乃若賑糧賑銀之發不可輕減減圭撮銖兩之微累之便侵千百口之食關係生命匪淺鮮也乾隆三十五年

諭直隸被水各屬現有應行賑卹之處著撥部庫銀五十萬兩以資分給銀庫舊例凡遇應發銀兩除俸餉外俱有應扣平餘此在工程等項需用銀兩原不必悉照部發支放若地方偶有災歉特發帑銀賑卹惟期間閭實被恩膏毋許不肖官吏絲毫剋扣其事較俸餉爲重豈可於部庫撥給時分兩稍有輕減此次銀兩著該部

即於庫貯元寶內如數發往嗣後遇賑卹之項俱照此行著為令  
欽此

聖訓嚴切慎之於發帑之初正防之於散賑之際也嘉慶六年  
詔命使者八人分路查災有多救活一民即減朕一分之罪之  
諭聞者莫不感涕官吏激發天良勿遺漏更勿輕減斯實惠周矣且

夫賑數具有可循殊恩必出自

上而或災祲迴越乎尋常臣下為民請命亦有不拘牽乎成例  
者乾隆五年戶部酌議賑卹事宜奉

旨賑濟之事最關緊要不可不先定條例以便遵行然臨時情形難

以預料惟在督撫因時就事熟籌妥協如果應行賑濟即於常例  
之外多用帑金朕亦無所吝惜等因欽此

仁主怙冒之洪惟恐臣工遇奇災而泥常例未能盡甦民困也詳味  
聖旨可以審時事之宜任破格為之而勿懷觀望矣至寒士有別於

齊民非若飢軍貧竈可與民一例給賑而遇災艱窘亦應加  
以體卹乾隆三年

諭各省學田銀兩原為散給各學廩生貧生之用但為數無多地方  
偶遇歉年自不便令有司與貧民一例散賑嗣後凡遇地方賑貸  
之時著該督撫學政飭令教官將貧生等名籍開送地方官核實



詳報視人數多寡。卽於存公項內量發銀米。移至本學教官均勻散給等因。欽此。此動存公銀給貧生之始。不僅贍以學租也。迨七年有乏食生。監准其領賑之。

諭則以江南疊遭水患。偶爾行之。初非定例。而

聖朝之體卹寒峻者。禮優而惠洽矣。凡我有官君子。遵

本朝之成憲。繹

列聖之德音。根極於惻隱之心。濟之以精明之識。法令森嚴而莫犯。施行果斷而不疑。弊竇悉除。生機盡達。責實不求名。而實德洽乎黎庶。爲善不求報。而善慶流於子孫。庶幾幹天行宣。

皇澤以無負。

聖天子誠求民瘼之殷懷也。豈不懿歟。

聖天子斯亦其與之類難也其亦難  
 聖天子斯亦其與之類難也其亦難  
 聖天子斯亦其與之類難也其亦難  
 聖天子斯亦其與之類難也其亦難  
 聖天子斯亦其與之類難也其亦難  
 聖天子斯亦其與之類難也其亦難  
 聖天子斯亦其與之類難也其亦難  
 聖天子斯亦其與之類難也其亦難  
 聖天子斯亦其與之類難也其亦難  
 聖天子斯亦其與之類難也其亦難

籌濟編卷七

常熟楊景仁靜閑輯

煮賑

月令仲秋之月行糜粥飲食行猶賜也繫之於養衰老之下  
 殆不遍及也檀弓載齊大饑黔敖為食於路以待餓者而食  
 之尚未專言粥也而公叔文子當衛國凶饑為粥與國之餓  
 者此實設粥賑飢之始救荒銀米兼賑可以無飢而未發賑  
 以前有窘迫而不能久待者已加賑之後有艱難而不能接  
 濟者則賑粥之不可廢也明甚為煮賑條第六



漢安帝元初四年京師及郡國十雨水詔曰今年秋稼茂好而連雨未霽懼必淹傷郡縣雖有糜粥糠粃相半長吏怠事莫有躬親其務崇仁恕賑護寡獨稱朕意焉後漢書

獻帝興平元年三輔大旱時穀一斛五十萬豆麥一斛二十萬人相食啖白骨委積帝使侍御史侯次出太倉米豆為飢人作糜粥經日而死者如故帝疑賑卹有虛乃親於御座前量試作糜乃知非實使侍中劉艾出讓有司收侯汶考實杖五十自是之後多得

全濟後漢書

陸續仕郡戶曹史時歲荒民飢困太守尹興使續於都亭賦民餽

粥續悉簡閱其民訊以名氏事畢興問所食幾何續因口說六百

餘人皆分別姓名無有差謬後漢書

南北朝梁任昉為義興守歲荒以私奉米豆為粥活三千餘人時

產子者不舉昉嚴其制罪同殺人孕者供其資費濟者千室南史

北魏孝文帝太和七年以冀定二州饑詔郡縣為粥於路以食之

定州上言為粥所活者九十四萬七千餘口冀州上言為粥所活

者七十五萬一千七百餘口文獻通考

河南王曜子平原為齊州刺史時歲頻不登平原以私米三千餘

斛為粥以全人命北州戍卒一千餘人還者皆給路糧百姓咸稱

詠之北史

韋肱年十八辟州主簿時屬歲儉肱以家粟造粥以飼飢人所活

甚眾魏書

房景遠好施與頻歲凶儉分贍宗親又於通衢設粥以食餓者平原劉郁路經濟竟遇劫賊殺人次至郁郁呼曰與君鄉近何忍見殺賊曰若鄉里親是誰郁曰齊州主簿房陽是我姨兄陽是景遠小字賊曰我食其粥得活何得殺其親遂還衣物蒙活者二十餘

人魏書

宋太宗淳化之歲嘗自七月至九月雨不止壁壘廬舍多壞物價

踊貴太宗加給復賜淖糜以救其變曾鞏本朝政要策

真宗五年遣中使詣雄霸瀛莫等州為粥以賑飢民通考

陳堯佐知壽州遭歲大饑自出米為糜以食餓者吏民皆爭出米活數萬人公曰豈以是為私惠哉蓋以令率人不若身先而使其

樂從耳名臣言行錄

程子曰救饑者日得一食則不死矣當先營寬廣居處切不得令相枕藉宿戒使晨入午而後與之食擇羸弱者作稀粥早晚兩給勿使至飽俟氣稍完然後一給其力能自營一食者皆不來矣比之不擇而與當活數倍多也程氏遺書○景仁按陳氏龍正謂日只一餐恐不足以救其死莫若俟其

食畢。每人或給米二三合。或給糕餅數枚。以代下次之餐。彼既不專守候於此。又可往他處營生。此法似較密。

葉衡知常州。水潦為災。衡發倉為糜。以食饑者。或言常平不可輕

發。衡曰。儲蓄正備緩急。可視民飢而不救。耶。疫大作。衡單騎命醫

藥自隨。徧問疾苦。活者甚眾。宋史

王致遠知慈谿縣。浙東大饑。致遠請邑賢士大夫。分僧寺置局。為

粥。以食飢者。始食日千人。既而鄰民紛至。日至八千人。已俸不足

復詣上臺。借助勸巨室出粟。以續之。迨麥熟始罷。習是編

祝染延平沙縣人。遇歲歉。為粥以施貧民。後生一子。省試舉首。春

榜將開。里人夢報人手持狀元大旗。上書施粥之報四字。及榜發。

果狀元及第臣鑒錄

倪閃好施予。每出遇貧。則以錢擲其家。紹興四年。大饑。道殍相枕。

閃設糜粥濟之。活者萬計。次年赴試。夢監旗門首書。饘粥陰功。四

字果魁。天下後至。尚書。臣鑒錄

元泉郡饑。民多就食。永春盧琦命分諸浮圖。及大家為糜食之。存

活不可勝計。元史

順帝至正十二年。起復余闕為淮東宣慰副使。守安慶。春夏大饑。

捐俸為粥。以食之。請之中書得鈔三萬錠。以賑之。元史

明嘉靖十七年。席書疏云。臣竊見南京饑饉殊甚。賣牛畜鬻妻女。

老弱展轉少壯流移甚或餓死於道廷議賑卹但饑民甚多錢糧絕少惟作粥一法不須防姦不須審戶至簡至要可以救人世俗謂作粥不可輕舉緣有行之一城不知散布諸縣以致四方饑民聞風駢集主者勢力難及來者壅積無算遂謂作粥不宜輕舉不知辰舉而民卽受惠三四舉而卽可安輯其效速其功大此古遺法扶顛起斃未有先於此急於此者康濟錄

蕭達漢陽人嘉靖甲辰楚大饑出粟濟之粟盡復措千金易粟作粥食饑者時未有子也一夕夢中見數百人羅拜曰來報凶年活命恩一人手攜兩孺子曰請以為嗣所以報也庚戌長子良有生

丙戌仲子良譽生先後中鄉舉萬歷庚辰良有以會元及第良譽

亦登高第楚人有漢陽雙鳳之謠臣鑒錄○景仁按救荒有生生之理天必佑之而生賢子孫黃

山谷詩有云能與貧人共年穀必有明月生珠胎理有固然也

萬歷二十八年河南大饑御史鍾化民令各府州縣官遍歷鄉邨察舉善良以司粥廠就便多立廠所每廠收養饑民二百不拘土著流移分別老幼婦女片紙註明某廠就食以油紙護繫於臂彙立一冊聽正印官不時查點使不得東西冒應期至麥熟而止所到必行拾遺之法遍歷村墟粥廠以故地方官望風感動竭力賑救民賴以生時郭家村劉一鷗既貧且病囑其妻曰與其相守俱亡何若自圖生計其妻泣曰夫者婦之天死則俱死

耳何忍相棄乎。後賴鍾御史多設粥廠。食之而得生。○按諺云。飢時一口勝如一斗。死在須臾。即能行走。粥廠妙難盡述。鍾公令州縣鄉村多立廠。所在在救全。而且遍歷周觀。有司敢不竭力以生之乎。○康濟錄

萬歷二十九年。畢懋康巡按陝西。入關之始。見饑民嗷嗷。乃賑粥。將張司農救荒十二議發刻施行。其議有云。救荒法無如煮粥善。相應先儘各州縣。見在倉糧。盡數動支。又動本院贖銀。收買米豆。雜糧。煮粥接濟。然所謂救荒無奇策者。患在任之不真。任之不力。耳。若有真心。自有良法。又何災不可弭也。向得張司農救荒十二議。試有明驗。仰司即發刻。令各府印刷。分給各州縣。逐款著實舉。行。一親審貧民。先令里長報明貧戶。正印官親自逐都逐圖驗。

其貧窘給與吃粥小票一張。填寫里甲姓名。許執票入廠。仍登簿。萬不可令民就官往返等候。先有所費。要耐勞耐久。細心查審。

二多設粥廠。眾聚則亂。散處易治。今議州縣之大者。設粥廠數百處。小者百餘處。多不過百人。少則六七十人。庶釜爨便而米粥潔。鈴束易而實惠行。廠多則人不雜。各賑各方。而且易於識認。又無途宿風雨之苦。三審定粥長。

數百貧民之命。懸於粥長之手。不得其人。弊竇叢生。務擇百姓中之殷實好善者。三四人為正副而主之。四犒勞粥長。飢民羣聚。易於起爭。粥長約束。任勞任怨。上不推恩。激勸誰肯効力。盡心故宜。許其優免重差。特給冠帶匾額。近又有一法。半月集粥長於公。

堂任事勤者勞以盒酒花紅惰者量行懲戒以警其後有善人能

粥長當堂稟用官長給帖請來廠中協力料理五親察廠弊粥廠素稱弊藪惟在稽察

嚴密非守令躬察則不知警景仁按康濟錄載明末州縣官之賑

連夜於所經由處寺院中設廠壘竈堆儲柴米鹽菜炒豆高竿掛

黃旗書奉憲賑粥四大字於上集飢民等候官到鳴鐘散粥未到

則枵腹待至下午官去隨撤廠平竈寂然矣由是推之民安得不

困此事可為炯戒守令固當親察而大吏尤當并守令而密加稽

察又有以逸代勞之法限粥長三五日執簿赴堂領米諄諄囑其

用心察其勤惰又要時加密訪置大籤四根書東西南北四字日

抽一籤如東字單騎東馳不拘遠近直入廠中果有弊者造作不

精者分輕重而懲治之不可貸也六預備米穀倉廩不實支取

易匱或動支官銀糴買或勸借義民輸助必須多方設法預為完

備粥米既交粥長或搬運或變賣任從其便只要有米煮粥不許

吏胥因而索詐七預置柴薪廠中器皿不可強借惟鐵杓必須

官給兩個恐有大小故也煮粥之柴其費最多粥長等那堪賠累

即令在所領米內扣賣作價八嚴立廠規馭飢民如馭三軍號

令要嚴明規矩要畫一印簿照收到先後順序列名鳴鐘會食唱

名散籤凡散粥或單日自左行散起或雙日自右行散起或自上

散或自下散或自中散互為先後則人無後時之歎不至垂涎以

起爭端敢有起立擅近粥竈者即時扶出除名粥長不遵規矩亦



有所懲。九收留子女預示飢民不可擅棄子女。然而飢寒困苦難保其無萬一有之。令里老保甲老人等收起抱赴官局收養。仍給送來之人數十文以作路費。十禁止賣婦賣婦者當嚴禁。倘有迫切真情將夫妻盡收入廠中婦令撫嬰男歸廠用事完聽去。十一收養流民最苦者飢民逃竄以路為家須於通衢寬空處另立流民廠另置流民簿隨到隨收如若滿百須增廠舍若乞丐又立花子廠不得與流民共食。十二散給藥餌凶年之後必有癘疫疫者萬病同症之謂不論時日早晚人參敗毒散極效或九味羌活湯香蘇散皆可但須多服方驗或動官銀令醫生速為買

辦合廠散數十帖至夏間有感者為熱病敗毒散加桂苓甘露飲神效敗毒散不用人參加石膏為佳再令時醫定奪必不誤也。康濟

錄

山西巡撫呂坤賑粥法。一廣煮粥之地飢民無定方而煮粥有定處若不多設處所以粥就民恐奔走於場難宿於家或朝食一來暮食一來十里之外不勝奔波不便一也壯丁就粥便可隨在歇止而老病之父母幼弱之小兒羞怯之婦女餓死於家其誰看管不便二也乞粥以歸道遠難攜妄費難察不便三也不如十里之內就近村落寺觀各設一場庶於人情為便。一擇煮粥之人

舊日監督主管多委里甲老人。嗟夫難言之矣。無迫切之心。則痛癢不關。而事必苟。無綜理之才。則點察失當。而事不詳。無鎮壓之力。則强者多。暴者先。而惠不均。故定煮粥之法。當選煮粥之人。先令之講求。正印官親與問難。如於立法之外。另有良法者。卽行獎賞。則人人各奏其能矣。一行勸諭之令。善不獨行。當與善者共之。正印官執一簿籍。少帶人數。各裹餼糧。徧到鄉村。看得衣食豐足。房舍整齊之家。便入其門。親自勸勉。或願捨米糧若干。或願煮粥若干日。飼養若干人。務盡激勸之言。無定難從之數。如有所許。卽令自登簿籍。先爲獎勵。一別食粥之人。凡來食粥者。報名在

官立簿一扇。分爲二等六班。老者不耐餓。另爲一等粥。先給稍加稠病者。不可羣。另爲一等粥。先給少壯。另爲一等。最後給此。謂三等造次顛沛之時。男女不可無辨。男三等在一邊。女三等在一邊。是爲六班。一定散粥之法。播鼓一通。食粥之人。男坐左邊。以老病壯爲序。女坐右邊。亦然。每人一滿椀。周而復始。大率止於兩椀。老病者加半椀。一椀可也。每日夕。人給炒豆一椀。一分管粥之役。大粥場立總管一人。掌簿二人。司積二人。管米豆俱以廉幹者爲之。每鍋竈頭一人。炊手二人。壯婦人更好。柴夫一人。水夫十人。皆以食粥中之壯者爲之。有惰慢及作弊者。卽時杖逐。一計煮

粥之費凡米須積在粥廠嚴密之處司積者自帶鎖鑰每日每人  
以三合爲等食粥之人每日增減不同掌簿先一夕日落報名數  
於司積令某鍋煮米若干司積冒破米豆者每一升罰一擔竈頭  
尅減米豆者不論多少重責革出。一查盈縮之數不分軍民良  
賤不論本土流民除強壯充實男女不可輕收外其餘但係面黃  
肌瘦之人。疴羸襤褸之狀卽准收簿每簿分男女二扇每班常餘  
紙數葉以備早晚續到之人其人以日爲序如正月初一日趙甲  
某府某縣人見在何處居住有子無子初二初三以次登記。一  
備煮粥之具布袋若干條大鍋若干口木杓若干隻約與木梳若

干箇梳令食粥者自備甚便但大小不一恐多寡不同大木杓若干個水桶若干隻柴薪

不可多得卽差少壯食粥之人令其拾採。一廣煮粥之處須行  
各州縣一齊通煮使窮民各就其便而流來之人不致結聚但一  
場過五百人卽將流民撥於別場有父子夫妻一同隨撥蓋結聚  
易離散難老婦病女何害少壯男子不散必爲盜於地方接熟之  
日照歸流民法各發原籍更爲得所。一備草薦飢病之人坐臥  
無所亦易生疾州縣將穀稻藁秸織爲草薦令之鋪地庶不受濕  
有力之家平日肯織千百或冬月施與丐子或饑年散給粥場大  
陰德事事完另行獎勵。一獎有功如果有功無過者原委人役

大則送牌。小則花紅鼓樂。送至其家。以示優厚。一旌好義。看其米數之多寡。定旌賞之重輕。或送牌坊。或給免帖。或給冠帶可也。一賑流民。過往流民。倘過粥場。每人給粥三碗。炒豆一碗。仍問姓名登記。以便查考。一貯煮粥器皿。天道無十年之熟。一切煮粥器皿。須令收藏備造。一冊存庫。委付一人收掌。不許變價及被人花費。康濟錄

萬歷時。知常熟縣耿橘。有云。荒年煮粥。全在官司處置得法。非有司親嘗。嚴禁人眾。慮粥缺少。增添生水。往往致疾。惟就各處邨落。屬慕義者。主之畫地分煮。為當。康濟錄

徐光啟備荒考。垂死飢人。賑粥法。邊海有失風船。飄至塘。船中人。餓將絕者。急與食。往往狼吞。致死有煮稀粥。潑桌上。令飢人漸漸吮食之。方能得生。蓋飢腸微細。不堪頓食也。黃蘗雜煮。增粥法。取菜洗淨。貯缸中。用麥麩入滾水。調稀漿。澆菜上。以石壓之。不用鹽。滲六七日。後菜變黃色。味微酸。便成黃蘗矣。此後但以菜投蘗汁中。便可作蘗。不復用麩。取蘗切碎。和米煮粥。食之。每米二斗。可當三斗之用。雖不及純米。養人而充塞飢腸。聊以免死。亦儉歲縮節一法也。農政全書

國朝魏冰叔禧擇地聚人賑粥法。城四門擇空曠處為粥場。蓋以雨

棚坐以矮橈繩列數十行。每行兩頭豎木橈繫繩作界。飢民至令  
入行中挨次坐定。男女異行。有病者另入一行。乞丐者另入一行。  
預諭飢民各攜一器。粥熟鳴鑼。行中不得動移。每粥一桶。兩人舁  
之而行。見人一口分粥一杓。貯器中。須臾而盡。分畢再鳴鑼一聲。  
聽民自便。分者不患雜蹂。食者不苦見遺。限定辰申二時。亦無守  
候之勞。庶法便而澤周也。因里設廠賑粥法。施粥者必須因里  
設廠。若勞其遠行。恐半途仆斃。又須立人監理。令飢民至者隨其  
先後來。一人則坐一人。後至者坐先至者之下。已坐者不許再起。  
一行坐盡。又坐一行。以面相對。以背相倚。空其中路。可令擔粥人  
行走。坐至正午。擊梆一通。高唱給第一次食。令入次序輪散。有速  
食先畢者。不得混與。一次散訖。然後擊梆二通。高唱給第二次食。  
如前法。共三次。卽止。蓋久飢之人。腸胃枯細。驟飽卽死。惟飢民中  
稱有父母妻子臥病在家者。量給攜歸。處分已訖。方令散去。散去  
之法。令後至坐外者先行。挨次出廠。庶不擁擠踐踏。又多人羣聚。  
易於穢染生病。須多置蒼朮醋椀。薰燒以逐瘟氣。又不時察驗。嚴  
禁管粥者尅米。將生水攪稀。食者暴死。其椀箸令飢民自備。再米  
多亦不得施飯。久飢食飯有立死者。挑擔就人賑粥法。擔粥無  
定額。無定期。亦無定所。每晨用白米數斗。煮粥分挑。至通衢若郊

外凡遇貧乞令其列坐人給一杓每擔需米五六升可給五六  
 人之餐十擔便延五六百人一日之命或數日或旬日更有仁人  
 繼之諸命又可暫延無設廠之勞有活人之實既可時止時行又  
 且無功無名量力而行隨人能濟眾每日有仁方矣此崇禎辛巳

嘉善陳龍正賑粥法也

康濟錄○明張氏曰擔粥須用有蓋水桶外用小籃備鹽菜椀筋○景仁按沈少參

正宗謂擔粥法止可待流亡之在其途者若救土著飢民煮粥叢  
 弊不若分地挨戶給以粥米既可活人又不叢聚但須分給得當  
 時加親察張清恪公謂極貧人宜賑粥紳富鮮有行之者蓋施粥  
 之名一出人來必眾不得則怨擔粥之法富家有願施粥者每  
 遇風雪寒冷難以求食之日煮粥一擔令人肩挑隨處給食明日  
 再煮陸續挑給擔粥者眾則全活者多且無斂怨爭擠之患此在  
 富者所費有限而貧者續命已多二說不同各有所見戶給粥米  
 固勝於因粥釀疫然亦恐有貧病不能舉火而待命頃刻者則擔

粥之法為善要在酌乎人地之宜則並行不悖耳

慕鶴鳴漕督天顏撫蘇時疏曰賑濟莫若就災地近區多設粥廠  
 在道路適均處煮粥散食使飢民遠不過十里便其扶老攜幼則  
 稍可自全者決不蒙恥食粥濶濫之弊一清所賑之民甚溥臣先  
 為勸捐米石發往各邑飭令城鄉各設廠五六處公舉好義紳士

董其事

江南通志

陸氏曾禹曰粥廠事務雖多其要有五一貴多廠無遠涉之苦門  
 外之嗟二貴得人無廢弛之事冒破之求三貴巡察不事虛名立  
 平賑竈四貴犒賞人人竭力不忍相欺五貴得法實惠均霑不填

溝壑能若是可與公叔文子並傳矣。崇禎庚辰年浙江海寧縣  
雙忠廟賑粥人食熱粥畢卽死每日午後必埋數十人與宋時湖  
州賑粥粥方離鍋猶沸滾器中飢人急食之食已未百步而卽死  
者無異後杭人何敬德知之遂於夜半煮粥置大缸中明旦分給  
死者寡矣其所以必死之故人知之乎凡食粥者身寒腹餒必然  
之勢身寒則熱粥是好腹餒則飽餐自調殊不知此皆殺身之道  
立死無疑故賑飢民粥萬不可過熱令其徐徐食之戒其萬勿過  
飽始可得生賑粥時尤須大書數紙多貼於粥廠左右上書餓久  
之人若食粥驟飽者立死無救食粥太熱者亦立死無救尤宜令

人時時高唱於廠中使瞽者與不識字者皆知之庶可自警否則  
烏能知其久飢與不久飢而豈可概薄其粥令其不飽哉舊傳  
新鍋煮粥煮飯煮菜飢民食之未有不死者故廠中須用舊鍋萬  
一舊鍋不足須用新鍋或向菴堂寺院或向飯鋪酒家換取舊鍋  
備用庶不致損人之命不論男婦到廠吃粥倘懷中有嬰兒者  
許給一人之粥令其攜歸哺之彼利此粥不致棄子造福更大也  
少婦處女初次到廠吃粥之後當急于半月之糧令其吃完此  
米再到廠中來吃一次如前給之後皆倣此不可令彼含羞忍恥  
日日到廠挨擠稠人廣眾之中也荒年有外具衣冠內實飢餒

不能忍恥就食者。如託人瓶鉢取食。勿生疑阻。倘訪知果赤貧無  
人轉託者。更宜挑擔上門量給之。凡賑粥當在十月初旬為始。  
此際草根樹皮無從得覓。無粥則有死而已。其止當在三月初旬。  
此時草木既已萌芽。飢者或有賴於一二也。粥廠之開。貴早不  
貴遲。枵腹者不能再候也。貴近不貴遠。貧病者不能遠步也。貴久  
不貴暫。禾麥未熟不能自食也。廠急促不能力辦。菴堂寺院皆可  
代也。康濟錄

陸桴亭世儀勸施米湯約曰。荒歲米貴。民多食豆粿麩糠草根諸  
雜物。澀滯塞腸。久飢者每每致死。嘗考方書。惟穀性最養人人。但

得穀氣。卽累日可以不死。因思今素封家。雖無餘力。可以活人。然

朝夕炊粥飯時。幸少增勺米湯。沸必挹取數盞。盛大甕中。多多益

善。明晨以湯再炊。量入麥粉少許。使成稀粥。更以水薑三四塊。擣

碎調和。飢民畏寒。有薑汁。則辟寒氣。通腸胃。各就門首施之。或一次。或早晚二次。湯

盡為度。用以稍潤飢民腸胃。凡有活人之心。宜無不以為然者。問切

齋文

黃慎齋澄煮麥粥法。日用大麥磨成麩子。每麩八升。加以碎米二

升。調成糊粥。遇饑年。擇一倚傍廟宇空處。對面搭棚十間。兩頭設

立木柵門。門派二役把守。柵內砌土竈五眼。用大鍋五口。滿貯清



水燒令滾沸。預將米粉麥麩二八拌勻。堆貯棚內。一鍋水滾入麥麩攪勻。頃刻濃熟可吃。用大約約一大碗。自東柵門放飢民魚貫而入。就鍋與一大杓。挨次給散。令其由西柵而出一人掌杓施粥。其調煮之人。卽於第二鍋內下麩調攪。頃刻又熟。二鍋散完。卽散三鍋。次第以至五鍋。而第一鍋又早水滾可用矣。鍋不必洗。人不。停手。竈下十人。竈上十人。共二十人替換。足供是役。計麩粉每升可調三四杓。濟三四人。計三四石可濟千人。每日調粥十餘石。則濟四五千。人初不慮擁擠也。自卯末辰初散。至午末竣事。計麥麩米。糶之價較米價止十分之五。而人工費用器具。又省十分之七。

八矣。其便有五一價賤。則經費可充可久。一麩粉麤於米粥。非實在飢民不來爭食。一米糶拌入麥麩之中。廠內人不能侵剋。攪熟可現吃。非若冷粥傷人脾胃。一頃刻成熟可吃。非若米粥必隔夜燒煮。不費人工時候。如境遇大荒。城鄉分設四廠。可無受飢之民矣。但須預於半月前發米磨糶。發大麥磨麩。責成磨坊碾部陸續磨運堆貯。以供應用無缺。查大麥麩子。淮揚徐海貧民藉以日食。收買甚易。江以南則須買麥。焙熟再用。以免傷人脾胃。切問齋文鈔黃子正給諫六鴻曰。設粥宜舉有德鄉紳殷實者善董其事。使赴廠飢民按時而至。各廠散粥俱同時起止。以免貪民彼此馳騫。反

致誤領印官不時至廠親嘗其粥庶奸胥不敢剋扣攬和其散粥之法或設大廠或假寺院左右建立柵門內留寬地度可容千人柵門撥役司啟閉每日散粥時放飢民入盡即閉非執事人不許擅入監散官預置大籌一千長五寸小籌五百長三寸監散官畫押罩以桐油每百根一穿交付董理人於廠東西各設一門選練事人司掌領粥飢民俱令由東門入門設書寫數名各置一簿問實飢民姓名籍貫有無攜帶幼小兒女照登簿上大口給一大籌小口給一小籌令執詣廠領粥管粥人將籌收存隨即按籌給粥大籌一杓小籌半之領過即令由西門出門外撥役巡察領過粥

者不得混走於東未領粥者不得混走於西柵外有飢民後至者放入亦令往東邊候領飢民領粥已徧然後開柵放行夫散粥按籌人多不能冒領出入異門往來免致擁擠已未領東西各別以杜奸滑混入重支如此可無失領複給之弊矣

福惠全書

方恪敏公觀承曰州縣煮賑本城設廠一處委官主之四鄉適中之地分設數處擇鄉官貢監之有行者主之先計一廠食粥之人約有若干千人日需米三四石石米用四大釜一釜煮米五升作五次煮成黃昏浸米四鼓起爨至天明可成粥三次已刻五次皆成貯以潔淨大甕製鐵杓十餘令一杓所盛足三四椀廠外搭蓋

筵棚簽椿約繩爲界先期出示曉諭男女各爲一處攜帶器皿清晨各赴某地或寺或棚齊集以鳴金爲號男婦皆入金三鳴門閉留一路點發禁人續入製火印竹籌二三千根點發時人給一籌先女後男先老後少依次領籌出至廠前男左女右十人一放東進西出每收一籌與粥一杓有懷抱小口者增半杓得粥者卽令出廠以次給放自辰及午而畢老病不能行走者鄉地報明查其親屬有在廠食粥者造入名冊一併發籌給領賑紀那繹堂先生彥成煮賑條款一阜蘭往年隆冬煮賑每鍋用粟米四倉升豆麩四倉升約可食大小口二十人此次應仿照行之

每日開銷小口二合五勺糧五派員驗量米麩如數監視下鍋免剋減浮冒

之弊再該處難覓粟米者秦州可用包穀西寧可用青稞煮賑嘉慶

十五年甘省夏禾被旱涼州等處先設粥接濟武威令稟請將倉貯小麥內動支炒磨散放炒麩均由省派員會

同監視散放一設大小木籌以防重領領粥人多應酌量多寡

置備或一尺或八寸長木籌一分上用火烙雙單印記外備五寸

或四寸長小木籌一分如於雙日開廠則於先一日委員訊明姓

名年歲何縣造冊存查每名給雙印大籌一根次早委員在門外

用小籌將大籌換回積至百根或二百根開門放入廠內委員隨

收回小籌卽行給粥並換單印大籌爲明晨單日支領粥麩之需

發領後由旁門放出鳴鑼一聲。廠外委員聽聞。即將續換之百名。或二百名。復行放入。如此則廠內無擁擠之虞。而食粥窮黎。已換大籌。雙單印記不符。不能重領。且放籌有數次。早煮粥多寡。即可以放籌爲準。委員稽查人數。亦可以取放木籌核算。至新來貧民。有請領粥賑者。亦於先一日赴委員處問明。添入冊內。按日給予雙單印籌。庶免紊混。一出外窮黎。俟放賑有期。宜隨時勸諭。回籍。早安生業。其無力回籍者。地方官計算歸程。按日給予下色糧五合。一入秋天氣早涼。宜在空闊處所。酌蓋蓆棚。或擇空閒窰屋。廟宇。俾蔽風雨。卽得住宿。仍分別男女。不得攙混。

賑紀

景仁謹按。呂東萊論救荒。以設糜粥爲下。惠仲孺亦謂荒政之弊四。而行粥居第一。良以行粥之舉。壯者得歡。而不能及幼孤老病之人。近者獲餽。而不能周僻壤深山之境。且萃數千飢餒疲民於一廠中。氣蒸而疫癘易染。眾聚而奸盜易萌。强者數次重餐。弱者後時空返。卽其得食者。仰給一盂。奔馳數里。晨往夕還。衝風冒雪。得毋憊甚。況重以吏胥侵蝕。撩以石灰。雜以糠粃。嗟爾嗷鴻。活者二三。而死者十六七矣。然此究非法之弊也。乃行法者之弊也。夫苟行之而不善。雖良法皆成弊藪。何獨於設粥而議之。苟行之而善。雖常法可絕弊。

端何獨於賑粥而廢之。竊以爲災黎未賑之先。待哺孔迫。旣賑之後。續命猶難。惟施粥以調劑其間。則費易辦而事易集。又如外至流民。戶口難稽。人數無定。非煮粥曷濟乎。此不獨富厚者碩。宜行之鄉里。卽有司亦當行之郡邑。而不可廢也。前代糜粥之設。著有良規。

國朝偶逢歉歲。軫卹多方。而煮賑之典。未嘗偏廢。查康熙六十年。直隸饑。發米各州縣煮粥賑濟。雍正元年。覆准。浙江富陽等縣。衛被旱。飢民按口煮粥。至來年麥熟。停止。三年。覆准。江南睢寧宿遷二縣水災。動支積穀。自十月初一日爲始。煮

粥散賑。五月。四年。安徽之無爲等州縣。被災窮民。寒冬乏食。煮賑。五月。六年。議准。凡賑濟飢民。近城之地。仍設粥廠。其遠在四鄉。於二十里之內。各設米廠一所。照煮賑米數。按口一月一領。乾隆八年。廷議。向例五城設飯廠十處。自十月初一日起。三月二十日止。今因河間等處旱災。外來貧民日眾。且閏年天氣早寒。請改期於八月望後。每廠日添米二石。嗣以赴廠就食者日多。復經五城御史奏請。每廠日添米五石。五城十廠日煮米五十石。並經大學士等議於京東之通州。京西之良鄉。分設飯廠二處。搭蓋席棚窩舍。俾續來流民得以

就食栖宿其時固安武邑均經捐俸煮賑嘉慶六年六月京師被水中頂廟內存留難民千餘先於該處設廠置賑五城乏食貧民照每年冬月例設飯廠煮賑一月旋經展賑一月又發京倉稔米二千石給永定門外各災民造飯長新店等處及右安門外再撥米石設廠賑濟又散賑之增壽寺設立飯廠煮賑一月又以直隸水災較重大興宛平等六十州縣於明歲正月至四月麥收時止各按村莊多設粥廠無論極次貧民一例給賑是年撥直隸旗租銀二十餘萬以備直屬煮賑又將薊州等七州縣於明歲正月起按村煮賑至四月

止七年於蘆溝橋黃村東壩采育四處添設廠座專派卿員同地方官經理俾就食窮民分投領賑又將五城併作五廠均移至城外開放與蘆溝橋等處飯廠俱展至四月二十日止旋於內城改回一廠俾城內貧民前往領賑又五城內外各廠再行展賑不拘日期俟甘霖大沛酌量奏停後展至五月初五日為止十年豫省新鄉等十七州縣連歲歉收酌撥倉穀五萬七千石分撥各縣碾米煮賑十一年有淮揚貧民就食該處歲底展煮賑一個月又山西被旱賑畢復將平蒲等屬二十六州縣煮賑展至四月底止襄陵等四縣展至六



月底止計口散給粥米十五年甘肅被旱皋蘭及西寧涼州  
 中衛秦州五處分設粥廠賑卹出外飢民此歷來煮賑之典  
 行之具有成效煮飯固足以果其腹而煮粥亦足以療其飢  
 也伏查康濟錄賑粥須知論曰雖云一粥是人生死關頭須  
 要一番精神勇猛注之庶幾開市窮鄉皆沾利益誠至言也  
 必如惠仲孺之所論以賑粥為弊政不幾於因噎廢食乎爰  
 采輯良法著其利弊賢司牧及鄉里耆碩有志振窮者知其  
 弊而杜之散其利而普之雖謂煮賑為盡善之仁術可也

欽定四庫全書  
 欽定四庫全書  
 欽定四庫全書

